

I. DISPOSICIÓN XERAIS

XEFATURA DO ESTADO

960 *Real decreto lei 2/2019, do 25 de xaneiro, polo que se adoptan medidas urxentes para paliar os danos causados por temporais e outras situacións catastróficas.*

Desde comezos do ano 2018 veñen sucedendo diversos e continuados sinistros que ocasionaron situacións de emerxencia ou de natureza catastrófica que alteraron substancialmente as condicións de vida da poboación e produciron graves danos persoais e materiais, tanto en bens privados como en bens, instalacións e servizos públicos, así como en explotacións agrarias e en infraestruturas municipais.

Tras un outono anormalmente seco, como o sufrido na Comunidade Autónoma de Aragón e, en xeral, en todas aquelas que constitúen a bacía do Ebro, durante os primeiros meses do ano 2018 sucedéronse temporais de choiva, sarabia e neve, o que motivou unha saturación da capacidade de absorción do solo.

Esta inestabilidade mantívose durante os meses de marzo e abril, e chegaron a producirse inundacións por desbordamento que comportaron a intervención da Unidade Militar de Emerxencias tanto na ribeira alta como na ribeira baixa do Ebro. Estes temporais repetíronse durante o mes de maio, en que se sucederon números episodios de fortes choivas e intensos pedrazos.

Igualmente, durante os primeiros meses do ano 2018, principalmente de febreiro a marzo, a Comunidade Autónoma de Andalucía resultou gravemente afectada por temporais de fortes ventos, precipitacións, inundacións e mesmo tornados, así como mareas que azoutaron o litoral, arrasando praias, establecementos e vivendas, afectando todo tipo de infraestruturas e a rede viaria pública e privada. Pola súa parte, a Comunidade Autónoma de Extremadura, durante os meses de marzo a maio, sufriu danos polas precipitacións intensas, sarabias e inundacións.

A iso engádense os feitos acaecidos durante os meses de agosto e setembro de 2018 en distintas localidades das provincias de Badajoz e Cáceres.

Durante a época estival, que se estendeu mesmo ata o mes de setembro, os episodios que incidiron máis negativamente nas condicións de vida da poboación e que supuxeron danos máis graves localizáronse principalmente en municipios das comunidades autónomas de Cantabria, Cataluña, Aragón, Andalucía, Castilla-La Mancha e Valenciana, onde se sucederon diversos fenómenos atmosféricos con fortes episodios de choivas torrenciais e pedrazos.

Durante o mes de agosto, en particular, entre os días 7 e 9, un incendio forestal de grandes proporcións asolou a Comunidade Valenciana. O día 6 de agosto de 2018 declarouse un incendio forestal na zona do termo municipal de Llutxent (Valencia). A situación meteorolóxica e o abrupto do terreo fixeron que o incendio se estendese aos termos municipais de Pinet, Quatretonda, Barx, Gandía, Ador e Rótova, e víronse afectadas ata 3.000 hectáreas, cun perímetro aproximado de 35 quilómetros. O lume chegou a diversas urbanizacións e a vivendas illadas, e tiveron que ser evacuados máis de 2.500 afectados.

Coa chegada do outono, e durante todo o mes de outubro, episodios como a cola do furacán Leslie ou a denominada «gota fría» foron xerando severos episodios de choivas torrenciais e desbordamentos de torrentes que afectaron principalmente municipios das comunidades autónomas de Andalucía, Cataluña, Castilla-La Mancha, Illes Balears e Valenciana. Especialmente dramáticas foron as consecuencias das choivas intensas producidas o día 9 de outubro, que supuxeron importantes desbordamentos de torrentes na comarca de Levante da illa de Mallorca, integrada polos municipios de Artà, Capdepera, Manacor, Sant Llorenç des Cardassar e Son Servera. A inundación provocou o lamentable

falecemento de 13 persoas, decenas de feridos e o realoxamento de 117 persoas, aínda que debe destacarse que algúns danos persoais puideron minimizarse grazas ás actuacións de rescate e evacuación por parte das forzas e corpos de seguridade do Estado e dos servizos de protección civil. Tense, ademais, coñecemento de danos en estradas, vehículos, infraestruturas municipais, vivendas, establecementos comerciais e algunhas explotacións agrícolas e gandeiras dos termos municipais afectados.

Tamén é destacable o sucedido os días 18, 19, 20 e 21 de outubro, en que se produciron, igualmente, danos causados polas choivas torrenciais e desbordamentos de torrentes nas provincias de Málaga, Sevilla, Cádiz, Valencia, Castelló, Tarragona, Teruel e a Comunidade Autónoma das Illes Balears.

Por último, debe citarse o feito catastrófico acaecido o día 23 de maio de 2018 na parroquia de Paramos, no municipio de Tui (Pontevedra), onde se produciu unha explosión nun almacén de material pirotécnico que se atopaba anexo a unha vivenda. A explosión foi de tal magnitude que alcanzou un raio de 600 metros e a súa onda expansiva sentiuse a máis de catro quilómetros do lugar dos feitos. A explosión provocou o lamentable falecemento de dúas persoas (pais de dous menores tamén feridos, que pasaron a ser tutelados pola Administración autonómica), 37 feridos (dos cales 7 son menores) e un total de 792 persoas afectadas. Igualmente, víronse afectadas numerosas vivendas e producíronse danos no tendido aéreo de iluminación pública e cablaxe, nas vías, na rede de saneamento, etc. Unha vez iniciadas, por parte do Concello de Tui, as actuacións urxentes de desentullo, comprobouse a presenza de amianto entre os ditos cascallos, o que podería ocasionar un problema engadido de salubridade que afectaría a seguridade e a protección das persoas. Por tanto, foi necesaria, por interese público, a retirada urxente dos restos contaminados por amianto no lugar orixe do sinistro.

Os gravísimos danos persoais e materiais derivados das distintas situacións catastróficas anteriormente citadas, a magnitude das emerxencias, as medidas necesarias para remediar a grave perturbación das condicións de vida da poboación, o pleno restablecemento dos servizos públicos esenciais e, en definitiva, a recuperación da normalidade nas zonas afectadas xustifican a intervención da Administración xeral do Estado, desde o principio de solidariedade interterritorial e de maneira subsidiaria, complementando as actuacións que, en exercicio das súas competencias, teñen encomendadas as administracións territoriais.

Neste sentido, a Lei 17/2015, do 9 de xullo, do Sistema nacional de protección civil, prevé que, cando se produza unha emerxencia cuxa magnitude requira para a súa recuperación a intervención da Administración xeral do Estado, se aplicarán as medidas recollidas no seu capítulo V, logo da súa declaración, de acordo co procedemento previsto no artigo 23. Pola súa vez, o artigo 24 do citado texto legal recolle a relación de medidas que se poderán adoptar cando se produza a mencionada declaración, nos termos que aprobe o Consello de Ministros. Por último, a disposición derradeira segunda da Lei 17/2015, do 9 de xullo, recolle a habilitación específica ao titular do Ministerio de Traballo, Migracións e Seguridade Social para desenvolver as medidas de natureza laboral e de Seguridade Social.

De conformidade co disposto nos artigos 23 e 24 e na disposición derradeira segunda da Lei 17/2015, do 9 de xullo, por proposta dos ministros do Interior, de Facenda, de Fomento, de Traballo, Migracións e Seguridade Social, de Industria, Comercio e Turismo, de Agricultura, Pesca e Alimentación, de Política Territorial e Función Pública, de Transición Ecolóxica e de Economía e Empresa, o Consello de Ministros, na súa reunión do día 7 de setembro de 2018, acordou declarar zonas afectadas gravemente por unha emerxencia de protección civil a Comunidade Valenciana, polos incendios acaecidos no mes de agosto de 2018, e o municipio de Tui (Pontevedra), como consecuencia da explosión de material pirotécnico o día 23 de maio de 2018. E nas súas reunións dos días 19 de outubro e 2 de novembro de 2018 acordou igualmente declarar zonas afectadas gravemente por unha emerxencia de protección civil os municipios de Artà, Capdepera, Manacor, Sant Llorenç des Cardassar e Son Servera, da Comunidade Autónoma das Illes Balears, como consecuencia das choivas torrenciais e desbordamentos de torrentes acaecidos o 9 de

outubro de 2018, e as provincias de Málaga, Sevilla, Cádiz, Valencia, Castelló, Tarragona, Teruel e a Comunidade Autónoma das Illes Balears, que sufriron os danos ocasionados polas choivas torrenciais e desbordamentos de torrentes acaecidos os días 18, 19, 20 e 21 de outubro.

Adicionalmente ás medidas adoptadas nos mencionados acordos, en aplicación do principio de solidariedade interterritorial, e do mesmo xeito que nas ocasións en que foi necesario actuar con carácter urxente ante situacións de alteración grave das condicións de vida da poboación nunha área xeográfica determinada, co fin de adoptar aquelas medidas que requiren unha norma con rango de lei, apróbase este real decreto lei.

A xurisprudencia constitucional sinalou reiteradamente que o real decreto lei é un instrumento lexislativo de urxencia ao cal resulta lícito recorrer cando se trata de remediar situacións concretas dos obxectivos gobernantais que requiren unha acción normativa inmediata, nun prazo máis breve que o que permite o procedemento lexislativo ordinario, ou mesmo o de urxencia, para a tramitación parlamentaria das leis, e correspóndelle ao Goberno o xuízo político sobre a concorrencia do presuposto habilitante da extraordinaria e urxente necesidade exixido polo artigo 86.1 da Constitución española. Ademais, véñse exixindo de forma reiterada unha conexión de sentido ou relación de adecuación entre o presuposto habilitante e as medidas adoptadas mediante o real decreto lei. Os mencionados requisitos concorren nas situacións provocadas recentemente polos fenómenos atmosféricos descritos, que ocasionaron gravísimos danos persoais e materiais en numerosos municipios de distintas comunidades autónomas. As medidas que puideron adoptarse mediante os citados acordos do Consello de Ministros ao abeiro do artigo 24.1 e concordantes da Lei 17/2015, do 9 de xullo, non contribúen suficientemente a restablecer a normalidade das zonas afectadas, e a adopción, coa necesaria celeridade que demandan as circunstancias, das recollidas polo artigo 24.2 da mencionada lei, como son determinados beneficios fiscais e medidas laborais e en materia de seguridade social, exige a aprobación dun real decreto lei. Trátase, polo demais, de medidas adecuadas para paliar en parte os efectos ocasionados por estes fenómenos atmosféricos en vivendas, establecementos e explotacións de distinta natureza, infraestruturas e equipamentos, dominio público hidráulico ou dominio público marítimo-terrestre.

De acordo co disposto no artigo 129 da Lei 39/2015, do 1 de outubro, do procedemento administrativo común das administracións públicas, este real decreto adecúase aos principios de boa regulación.

Na súa virtude, en uso da autorización contida no artigo 86 da Constitución, por proposta do ministro do Interior, da ministra de Facenda, do ministro de Fomento, das ministras de Traballo, Migracións e Seguridade Social e de Industria, Comercio e Turismo, do ministro de Agricultura, Pesca e Alimentación e das ministras de Política Territorial e Función Pública, para a Transición Ecolóxica e de Economía e Empresa, logo de deliberación do Consello de Ministros na súa reunión do día 25 de xaneiro de 2019,

DISPOÑO:

Artigo 1. *Obxecto.*

1. Este real decreto lei ten por obxecto adoptar medidas complementarias ás recollidas no acordo do Consello de Ministros do 7 de setembro de 2018 polo que se declararon zonas afectadas gravemente por unha emerxencia de protección civil a Comunidade Valenciana, polos incendios acaecidos no mes de agosto de 2018, e o municipio de Tui (Pontevedra), como consecuencia dunha explosión de material pirotécnico o 23 de maio de 2018, así como nos acordos do Consello de Ministros do 19 de outubro e 2 de novembro de 2018, polos que se declara zona afectada gravemente por unha emerxencia de protección civil os municipios de Artá, Capdepera, Manacor, Sant Llorenç des Cardassar e Son Servera, da Comunidade Autónoma das Illes Balears, como consecuencia das choivas torrenciais e desbordamentos de torrentes acaecidos o 9 de outubro de 2018, e as provincias de Málaga, Sevilla, Cádiz, Valencia, Castelló, Tarragona, Teruel e a Comunidade Autónoma das Illes Balears, que sufriron os danos causados polas

choivas torrenciais e desbordamentos de torrentes acaecidos os días 18, 19, 20 e 21 de outubro de 2018.

2. As medidas contidas neste real decreto lei e nos acordos do Consello de Ministros do 7 de setembro, 19 de outubro e 2 de novembro de 2018, mencionados no punto anterior, serán de aplicación aos danos causados polos temporais de choivas torrenciais, neve, sarabia e vento, inundacións, desbordamentos de ríos e torrentes, pedrazo, fenómenos costeiros e tornados, así como incendios forestais ou outros feitos catastróficos acaecidos desde o mes de xaneiro de 2018 ata a entrada en vigor deste real decreto lei.

A concreción dos sucesos, o seu ámbito territorial e as concretas medidas a que resultará de aplicación o previsto neste punto determinaranse por real decreto do Consello de Ministros, por proposta do ministro competente para a execución da correspondente medida.

3. O Goberno, mediante real decreto, poderá declarar, con delimitación das zonas afectadas, a aplicación das medidas previstas neste real decreto lei a outros sucesos de características similares que poidan acaecer ata o 31 de marzo de 2019.

Artigo 2. Axudas destinadas a paliar danos persoais, danos materiais en vivenda e enxoval, e en establecementos industriais, mercantís, agrarios, marítimo-pesqueiros, turísticos e doutros servizos, e por prestacións persoais ou de bens de persoas físicas ou xurídicas.

1. Nos supostos de falecemento e de incapacidade causados directamente polos feitos que motivan a declaración efectuada no artigo anterior, concederanse as axudas previstas no Real decreto 307/2005, do 18 de marzo, polo que se regulan as subvencións en atención a determinadas necesidades derivadas de situacións de emerxencia ou de natureza catastrófica, e establécese o procedemento para a súa concesión.

2. A destrución ou danos en enxoval e os danos en vivenda serán obxecto de axudas segundo o establecido no Real decreto 307/2005, do 18 de marzo.

Co obxecto de acreditar a titularidade sobre os inmobles afectados polos sinistros, admitirase como medio de proba calquera documento que demostre a dita titularidade, como os recibos de pagamento do imposto sobre bens inmobles ou outros de análoga natureza.

3. No caso de danos a establecementos industriais, mercantís, agrarios, marítimo-pesqueiros, turísticos e doutros servizos, cando o interesado fose indemnizado polo Consorcio de Compensación de Seguros con aplicación da franquía prevista no artigo 9 do Regulamento do seguro de riscos extraordinarios, aprobado polo Real decreto 300/2004, do 20 de febreiro, poderase conceder unha subvención de ata o 7 % da contía dos danos indemnizables producidos polo sinistro, ata o importe máximo recollido no artigo 28 do Real decreto 307/2005, do 18 de marzo, sen que, en ningún caso, a suma desta subvención e a indemnización que corresponda aboar en concepto de seguro, ou calquera outra subvención ou axuda pública ou privada, supere o valor do dano ou prexuízo producido. Nestes casos, o interesado deberá presentar unha certificación expedida pola súa entidade aseguradora acreditativa de que esta non aboou, en todo ou en parte, o importe correspondente á franquía legal aplicada polo Consorcio de Compensación de Seguros.

4. As solicitudes para a concesión destas axudas tramitaranas as delegacións ou as subdelegacións do Goberno nas comunidades autónomas e provincias afectadas, presentaranse no prazo de dous meses, contados a partir da entrada en vigor deste real decreto lei, e resolverá o ministro do Interior.

5. O disposto no punto anterior será tamén de aplicación ás solicitudes de axudas por danos persoais e ás de persoas físicas ou xurídicas que efectuasen prestacións persoais ou de bens reguladas no Real decreto 307/2005, do 18 de marzo.

6. As axudas que se concedan en aplicación do previsto neste artigo financiaranse con cargo aos créditos dos conceptos 471, 472, 482, 771 e 782 da aplicación orzamentaria 16.01.134M «Para atencións de toda orde motivadas por sinistros, catástrofes ou outros

de recoñecida urxencia», dotados con carácter de ampliables no vixente orzamento do Ministerio do Interior.

Artigo 3. *Beneficios fiscais.*

1. Concédese a exención das cotas do imposto sobre bens inmobles correspondentes ao exercicio en que tivese lugar o sinistro, 2018 ou 2019, sinistros ocorridos segundo o recollido no artigo 1, que afecten vivendas, establecementos industriais, turísticos, mercantís, marítimo-pesqueiros e profesionais, explotacións agrarias e forestais, locais de traballo e similares, danados como consecuencia directa dos sinistros a que se refire o artigo 1, cando se acredite que tanto as persoas como os bens neles situados tiveron que ser obxecto de realoxamento total ou parcial noutras vivendas ou locais diferentes ata a reparación dos danos sufridos, ou perdas nas producións agrícolas e gandeiras que constitúan sinistros cuxa cobertura non resulte posible mediante fórmula ningunha de aseguramento público ou privado.

2. Concédese unha redución no imposto sobre actividades económicas correspondente ao exercicio 2018 para os sinistros que tiveron lugar en 2018, e ao exercicio 2019 para os sinistros ocorridos en 2019 segundo o recollido no artigo 1, ás industrias de calquera natureza, establecementos mercantís, marítimo-pesqueiros, turísticos e profesionais cuxos locais de negocio ou bens afectados a esa actividade fosen danados como consecuencia directa dos sinistros, sempre que tivesen que ser obxecto de realoxamento ou se producisen danos que obriguen ao peche temporal da actividade. A indicada redución será proporcional ao tempo transcorrido desde o día en que se produciu o cesamento da actividade ata o seu reinicio en condicións de normalidade, xa sexa nos mesmos locais, xa sexa noutros habilitados para o efecto, sen prexuízo de considerar, cando a gravidade dos danos producidos dea orixe a iso, o suposto de cesamento no exercicio daquela, que producirá efectos desde o día 31 de decembro de 2017, cando o sinistro tivese lugar en 2018, e desde o 31 de decembro de 2018, cando o sinistro acontecese en 2019.

3. As exencións e reducións de cotas nos tributos sinalados nos puntos anteriores comprenderán as das recargas legalmente autorizadas sobre eles.

4. Os contribuíntes que, tendo dereito aos beneficios establecidos nos puntos anteriores, satisfixesen os recibos correspondentes aos citados exercicios fiscais poderán pedir a devolución das cantidades ingresadas.

5. Estarán exentas das taxas do organismo autónomo Xefatura Central de Tráfico establecidas pola Lei 16/1979, do 2 de outubro, a tramitación das baixas de vehículos solicitadas como consecuencia dos danos producidos polos sinistros, e a expedición de duplicados de permisos de circulación ou de condución destruídos ou extraviados polas ditas causas.

6. A diminución de ingresos en tributos locais que os anteriores puntos deste artigo produzan nos concellos, consellos insulares, cabidos insulares, deputacións provinciais e comunidades autónomas será compensada con cargo aos orzamentos xerais do Estado, de conformidade co establecido no artigo 9 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo.

7. Estarán exentas do imposto sobre a renda das persoas físicas as axudas excepcionais por danos persoais a que se refire o artigo 2.

Artigo 4. *Medidas laborais e de Seguridade Social.*

1. As suspensións de contrato e reducións de xornada e os despedimentos colectivos que teñan a súa causa directa nos danos producidos polos sinistros descritos no artigo 1, así como nas perdas de actividade directamente derivadas deles, nos establecementos referidos no artigo 2.3, que queden debidamente acreditados, terán a consideración de provenientes dunha situación de forza maior, coas consecuencias que derivan dos artigos 47 e 51 do texto refundido da Lei do Estatuto dos traballadores, aprobado polo Real decreto legislativo 2/2015, do 23 de outubro. No primeiro suposto, a

Tesouraría Xeral da Seguridade Social poderá exonerar o empresario do aboamento das cotas da Seguridade Social e por conceptos de recadación conxunta mentres dure o período de suspensión, manténdose a condición do dito período como efectivamente cotizado polo traballador. Nos casos en que se produza a extinción do contrato, as indemnizacións dos traballadores serán por conta do Fondo de Garantía Salarial, cos límites legalmente establecidos.

Nos supostos en que a empresa decida a suspensión de contratos ou a redución temporal da xornada de traballo con base en circunstancias excepcionais, o Servizo Público de Emprego Estatal e, se for o caso, o Instituto Social da Mariña poderán autorizar que o tempo en que se perciban as prestacións por desemprego, reguladas no título III do texto refundido da Lei xeral da seguridade social, aprobado polo Real decreto legislativo 8/2015, do 30 de outubro, que derivan inmediatamente dos sucesos incluídos no ámbito de aplicación deste real decreto lei, non se compute para os efectos de consumir os períodos máximos de percepción establecidos. Igualmente, poderá autorizar que reciban prestacións por desemprego aqueles traballadores incluídos nos devanditos expedientes que carezan dos períodos de cotización necesarios para ter dereito a elas.

2. As empresas e os traballadores por conta propia incluídos en calquera réxime da Seguridade Social poderán solicitar e obter, logo da xustificación dos danos sufridos ou das perdas de actividade directamente derivadas dos sinistros descritos no artigo 1, unha moratoria de ata un ano, sen xuros, no pagamento das cotizacións á Seguridade Social e por conceptos de recadación conxunta correspondentes a tres meses naturais consecutivos, contados desde o anterior á produción do sinistro ou, no caso de traballadores incluídos no réxime especial dos traballadores por conta propia ou autónomos, desde o mes en que aquel se producise.

3. Para levar a cabo as obras de reparación dos danos causados, as administracións públicas e as entidades sen ánimo de lucro poderán solicitar do Servizo Público de Emprego competente a adscrición de traballadores perceptores das prestacións por desemprego para traballos de colaboración social, de acordo co disposto no artigo 272.2 do texto refundido da Lei xeral da seguridade social, e no Real decreto 1445/1982, do 25 de xuño, polo que se regulan diversas medidas de fomento do emprego.

Artigo 5. *Reducións fiscais especiais para as actividades agrarias.*

Para as explotacións e actividades agrarias en que se producen danos como consecuencia directa dos sinistros a que se refire o artigo 1, e conforme as previsións contidas no número 4.1.º do artigo 37 do Regulamento do imposto sobre a renda das persoas físicas, aprobado polo Real decreto 439/2007, do 30 de marzo, e o número 3 do artigo 38 do Regulamento do imposto sobre o valor engadido, aprobado polo Real decreto 1624/1992, do 29 de decembro, o Ministerio de Facenda, á vista dos informes do Ministerio de Agricultura, Pesca e Alimentación, poderá autorizar, con carácter excepcional, a redución dos índices de rendemento neto a que se refire a Orde HFP/1159/2017, do 28 de novembro, pola que se desenvolven para o ano 2018 o método de estimación obxectiva do imposto sobre a renda das persoas físicas e o réxime especial simplificado do imposto sobre o valor engadido, e a Orde HAC/1264/2018, do 27 de novembro, pola que se desenvolven para o ano 2019 o método de estimación obxectiva do imposto sobre a renda das persoas físicas e o réxime especial simplificado do imposto sobre o valor engadido.

Artigo 6. *Réxime de axudas a corporacións locais e axudas extraordinarias para a retirada do amianto no municipio de Tui.*

1. Ás axudas a corporacións locais polos gastos causados para facer fronte a estas situacións de emerxencia non lles será de aplicación a contía prevista nos artigos 22 e 23 do Real decreto 307/2005, do 18 de marzo, de modo que o importe das axudas poida estenderse ata o 100 por cento dos referidos gastos de emerxencia.

Estas axudas non terán por obxecto as reparacións ou reposicións en infraestruturas recollidas no artigo 7. Non obstante, poderán subvencionarse aquelas actuacións

inaprazables que, incidindo no mesmo ámbito de aplicación a que se refire o dito artigo, se levaron a cabo co fin de garantir a vida e a seguridade das persoas e o funcionamento dos servizos públicos esenciais. Entre estas actuacións inclúense a evacuación, aloxamento e alimentación de persoas afectadas, a retirada de lodos e areas e a limpeza de vías e contornas públicas que sexan indispensables para os fins descritos.

Para estes efectos, exclúense do dito concepto os traballos levados a cabo con medios propios da corporación local, xa sexan materiais, tales como maquinaria ou ferramentas, ou humanos, entendendo por estes o persoal contratado con anterioridade aos feitos causantes. En ningún caso serán subvencionables os gastos de persoal xerados por bombeiros, policía local, protección civil e outros de carácter análogo.

2. Serán subvencionados os gastos realizados pola corporación local derivados de actuacións inaprazables en situación de emerxencia para o desentullo urxente de pezas de amianto e outros materiais tóxicos proxectados pola explosión acaecida no municipio de Tui o día 23 de maio de 2018, incluído o proxecto técnico e a dirección de obra relativos aos ditos traballos

3. As solicitudes para a concesión destas axudas tramitaranas as delegacións ou as subdelegacións do Goberno nas comunidades autónomas e provincias afectadas, presentaranse no prazo de dous meses, contados a partir da entrada en vigor deste real decreto lei, e resolverá o ministro do Interior.

4. As axudas que se concedan en aplicación do previsto neste artigo financiaranse con cargo aos créditos dos conceptos 461 e 761 da aplicación orzamentaria 16.01.134M «Para atencións de toda orde motivadas por sinistros, catástrofes ou outros de recoñecida urxencia», dotados con carácter de ampliables no vixente orzamento do Ministerio do Interior.

Artigo 7. *Cooperación coas administracións locais.*

1. Aos proxectos directamente relacionados cos sinistros a que se refire o artigo 1 que executen os concellos, as deputacións provinciais, os consellos e cabidos insulares, as comarcas, as mancomunidades e as comunidades autónomas uniprovinciais relativos ás obras de reparación ou restitución de infraestruturas, equipamentos ou instalacións e servizos de titularidade municipal incluídos no artigo 25.2 da Lei 7/1985, do 2 de abril, reguladora das bases do réxime local, e da rede viaria dos consellos e cabidos insulares e das deputacións provinciais, poderáselles conceder unha subvención de ata o 50 por cento do seu custo, excluídos os traballos levados a cabo con medios propios da entidade local, xa sexan materiais, maquinaria ou persoal.

2. Tales subvencións atenderanse con cargo ao crédito que para estes efectos se habilite co carácter de incorporable no orzamento do Ministerio de Política Territorial e Función Pública.

3. Facúltase a ministra de Política Territorial e Función Pública para establecer o procedemento para conceder as mencionadas subvencións, así como o seu seguimento e control.

Artigo 8. *Investimentos realizados para reparar os danos incluídos no ámbito de aplicación deste real decreto lei.*

1. Os investimentos realizados para reparar os danos a que se refire este real decreto lei polas entidades locais que cumpran cos requisitos establecidos na disposición adicional sexta da Lei orgánica 2/2012, do 27 de abril, de estabilidade orzamentaria e sustentabilidade financeira, terán a consideración de investimentos financeiramente sustentables.

2. Excepcionalmente, estes investimentos executaranse con carácter prioritario fronte a outros investimentos financeiramente sustentables.

Artigo 9. *Actuacións de restauración forestal e ambiental.*

Facúltase o ministro de Agricultura, Pesca e Alimentación para declarar zona de actuación especial as zonas afectadas, nas materias da súa competencia, e para declarar a emerxencia das obras que, en consecuencia, deberían ser executadas polo dito departamento, nas seguintes materias:

- a) Restauración hidrolóxico-forestal, control da erosión e desertificación, así como traballos complementarios nos espazos forestais incendiados para mitigar os posibles efectos de posteriores choivas.
- b) Colaboración para a recuperación e rexeneración ambiental dos efectos producidos polos incendios forestais nos espazos da Rede Natura 2000, en particular nos tipos de hábitats de interese comunitario e nos hábitats onde existan especies de interese comunitario, endemismos ou especies incluídas na listaxe de especies silvestres en réxime de protección especial.
- c) Apoio directo á retirada e ao tratamento da biomasa forestal queimada, se for o caso.
- d) Colaboración no tratamento para control de pragas nas masas forestais.
- e) Restauración de infraestruturas rurais de uso xeral e de camiños naturais.

Artigo 10. *Actuacións no dominio público hidráulico.*

Facúltase a ministra para a Transición Ecolóxica para declarar zona de actuación especial para a restauración do dominio público hidráulico as zonas afectadas na bacía hidrográfica correspondente, e a emerxencia das obras que deberá executar o devandito departamento, nas seguintes materias:

- a) Eliminación dos tapóns formados por restos vexetais procedentes dos incendios.
- b) Retirada dos carrexos, sedimentos e residuos que chegasen ou poidan chegar ata os leitos e provoquen unha diminución da súa capacidade de desaugamento.
- c) Reparación das marxes que sufrisen procesos erosivos, así como execución de defensas naqueles puntos máis sensibles a sufrir erosións.

Artigo 11. *Actuacións no dominio público marítimo-terrestre.*

Facúltase a ministra para a Transición Ecolóxica para declarar zona de actuación especial para a restauración do dominio público marítimo terrestre as zonas afectadas no litoral correspondente e a emerxencia das obras que deberá executar o dito departamento, nas seguintes materias:

- a) Restauración e demais obras que aseguren a integridade e adecuada conservación do dominio público marítimo-terrestre, así como os traballos complementarios para asegurar a sustentabilidade da costa e mitigar os efectos de futuros temporais e galernas.
- b) Protección e conservación dos elementos que integran o dominio público marítimo-terrestre, en particular, adecuación sustentable de praias e areas, sistemas dunares e zonas húmidas litorais, a súa recuperación e a súa rexeneración, así como realización, supervisión e control de estudos, proxectos e obras na costa.
- c) Reparación e restauración de estruturas danadas no litoral, como paseos marítimos, accesos ao dominio público, muros, etc.

Artigo 12. *Danos nas demais infraestruturas públicas.*

Facúltanse os titulares dos departamentos ministeriais competentes por razón da materia para declarar as áreas afectadas como zona de actuación especial, para que os ditos departamentos, os seus organismos autónomos e entidades públicas vinculadas ou dependentes deles poidan levar a cabo as actuacións de restauración que procedan. Para os efectos indicados, poderanse declarar de emerxencia as obras que executen tales

departamentos para reparar os danos causados en infraestruturas de titularidade estatal comprendidas no seu ámbito de competencias.

Artigo 13. *Réxime de contratación.*

1. Poderán ter a consideración de obras, servizos ou subministracións de emerxencia, logo do correspondente acordo do órgano de contratación, de se cumpriren os requisitos do artigo 120 da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, os contratos de reparación ou mantemento de infraestruturas, equipamentos ou servizos, de obras de reposición de bens prexudicados polas inundacións e de valoracións de danos, calquera que sexa a súa contía. Así mesmo, deberá terse en conta o previsto na disposición adicional centésimo trixésimo sexta da Lei 6/2018, do 3 de xullo, de orzamentos xerais do Estado, sobre comunicación do inicio de actuacións mediante o réxime de tramitación de emerxencia.

2. Declárase urxente a ocupación dos bens afectados polas expropiacións derivadas da realización das obras a que se refire este punto, para os efectos establecidos no artigo 52 da Lei de expropiación forzosa, do 16 de decembro de 1954.

3. Para tramitar expedientes de contratación de obras non incluídas no artigo 236.2 da Lei 9/2017, do 8 de novembro, dispensarase do requisito previo de dispoñibilidade dos terreos, sen prexuízo de que a súa ocupación efectiva deberá ir precedida da formalización da acta de ocupación.

Artigo 14. *Consortio de Compensación de Seguros.*

1. Os delegados do Goberno nas comunidades autónomas uniprovinciais afectadas e os subdelegados do Goberno nos demais casos, logo do informe da Dirección Xeral de Protección Civil e Emerxencias, poderán solicitar do Consortio de Compensación de Seguros, para unha máis correcta avaliación dos danos non persoais, as correspondentes valoracións necesarias conforme o artigo 2, sempre que non afecten bens de titularidade pública.

2. O Consortio de Compensación de Seguros terá dereito ao aboamento por parte da Administración xeral do Estado dos traballos de peritaxe conforme o baremo de honorarios profesionais que o dito consorcio tivese aprobado para os seus peritos taxadores de seguros.

3. Para facilitar a tramitación das axudas e a valoración dos danos, a Administración competente e o Consortio de Compensación de Seguros poderán transmitirse os datos sobre beneficiarios das axudas que se concedan e indemnizacións que se recoñezan, as súas contías respectivas e os bens afectados. As entidades aseguradoras que operen no territorio español estarán obrigadas a proporcionar ao Consortio de Compensación de Seguros a información que este lles solicite para dar cumprimento ao disposto anteriormente.

Disposición adicional primeira. *Datos persoais.*

O intercambio de datos sobre beneficiarios das axudas que se concedan, as súas contías respectivas e os bens afectados entre a Administración competente e o Consortio de Compensación de Seguros, necesario para facilitar a tramitación das axudas e a valoración dos danos, realizarase a través da Dirección Xeral de Protección Civil e Emerxencias e o Consortio de Compensación de Seguros mediante o procedemento que entre ambos establezan.

Disposición adicional segunda. *Créditos orzamentarios.*

As medidas referentes a danos en infraestruturas municipais e rede viaria das deputacións provinciais e consellos e cabidos insulares, actuacións no dominio público hidráulico e no marítimo-terrestre, actuacións de restauración forestal e ambiental,

actuacións na Rede Nacional de Camiños Naturais, e danos nas demais infraestruturas públicas, financiaranse de conformidade co previsto na Lei 47/2003, do 26 de novembro, xeral orzamentaria, e serán atendidas con cargo ás dispoñibilidades orzamentarias existentes nos departamentos ministeriais e entidades deles dependentes.

Naqueles casos en que se acrediten insuficiencias orzamentarias nos departamentos ministeriais, as actuacións poderanse financiar con cargo ao Fondo de Continxencia de Execución Orzamentaria, polo importe que se estableza no informe preceptivo da Secretaría de Estado de Orzamentos e Gastos, que solicitará o departamento ministerial. En todo caso, nos termos previstos no artigo 50 da Lei 47/2003, do 26 de novembro, a aplicación do Fondo de Continxencia aprobarase mediante acordo de Consello de Ministros.

Disposición adicional terceira. *Comisión interministerial de seguimento das medidas de apoio a damnificados.*

1. Créase unha comisión interministerial para a aplicación das medidas de apoio previstas neste real decreto lei, coordinada pola Dirección Xeral de Protección Civil e Emerxencias e integrada polos representantes dos ministerios de Facenda, do Interior, de Fomento, de Traballo, Migracións e Seguridade Social, de Industria, Comercio e Turismo, de Agricultura, Pesca e Alimentación, de Política Territorial e Función Pública, para a Transición Ecolóxica e de Economía e Empresa, así como polos delegados do Goberno nas comunidades autónomas afectadas e por un representante do Consorcio de Compensación de Seguros.

2. O seguimento das medidas de apoio previstas neste real decreto lei levarao a cabo a comisión a que se refire o punto anterior, en coordinación coas autoridades das comunidades autónomas afectadas, a través das delegacións do Goberno, e quedan á dispoñibilidade da dita comisión os recursos do Instituto Xeográfico Nacional aplicables á avaliación dos danos e a planificación da súa reparación, mediante o uso da información xeoespacial dispoñible, especialmente as coberturas de imaxes aéreas e de satélites obtidas ou que se obteñan a través do Plan nacional de observación do territorio.

3. Antes do 1 de outubro de 2019, a comisión interministerial elaborará un informe sobre as actuacións levadas a cabo en execución deste real decreto lei.

Disposición adicional cuarta. *Avaliación de impacto ambiental.*

Mediante acordo do Consello de Ministros determinarase a exención de avaliación de impacto ambiental daquelas obras de reparación ou rehabilitación de infraestruturas, equipamentos ou instalacións a que se refire este real decreto lei que, ben que deberían someterse a avaliación de impacto ambiental, conforme o artigo 7 da Lei 21/2013, do 9 de decembro, de avaliación ambiental, quedarán exentas da realización do dito trámite en cumprimento do disposto no artigo 8.3 e 4 da mencionada lei.

Disposición transitoria única. *Presentación de novas solicitudes.*

As solicitudes de axudas presentadas con anterioridade á entrada en vigor deste real decreto lei ao abeiro dos acordos de Consello de Ministros do 7 de setembro, 19 de outubro e 2 de novembro, todos eles de 2018, poderanse volver presentar nos prazos previstos nos artigos 2.4 e 6.3, sempre que algunha das condicións e requisitos para a concesión das ditas axudas fosen modificados por este real decreto lei.

Disposición derradeira primeira. *Título competencial.*

Este real decreto lei dítase ao abeiro do disposto nas regras 7.^a, 13.^a, 14.^a, 17.^a, 23.^a e 29.^a do artigo 149.1 da Constitución, sen prexuízo das medidas adicionais que poidan adoptar as comunidades autónomas.

Disposición derradeira segunda. *Revisión de contías do Real decreto 307/2005, do 18 de marzo.*

Modifícanse as contías recollidas nos artigos 17.e) e 28 do Real decreto 307/2005, do 18 de marzo, e manteñen o seu rango regulamentario. Polo tanto, as contías que se aplican son as seguintes:

- a) Por danos en elementos comúns de uso xeral dunha comunidade de propietarios en réxime de propiedade horizontal, ata unha cantidade máxima de 9.224 euros.
- b) Para paliar os danos en establecementos industriais, comerciais e de servizos recollidos no artigo 27, concederáse ata un importe máximo de 9.224 euros.

Disposición derradeira terceira. *Facultades de desenvolvemento.*

O Goberno e os titulares dos distintos departamentos ministeriais, no ámbito das súas respectivas competencias, ditarán as disposicións necesarias para o desenvolvemento e a execución do disposto neste real decreto lei.

Disposición derradeira cuarta. *Entrada en vigor.*

Este real decreto lei entrará en vigor o mesmo día da súa publicación no «Boletín Oficial del Estado».

Dado en Madrid o 25 de xaneiro de 2019.

FELIPE R.

O presidente do Goberno,
PEDRO SÁNCHEZ PÉREZ-CASTEJÓN